

# Республикм

Геедрсн ўрән олсн  
экин зўркнь амрв,  
Герлтсн республикән авсн  
хальмгин байрнь амрв...  
Байрар дўўрнь зўркм  
тенъгс мет өвклзнә,  
Батрсн хальмган мактгсн  
танъсг дуугъан эклнә:  
Делкә кедәд нисх  
дживр чамд ургъв,  
Дүмбр дуугъан дуулх  
джиргъл чамд учрв.  
Төрән медсн улсм,  
зөрмгәр уралан йович,  
Төрснн өргн газртан  
зөөр хоршахар зүткич.  
Эрән олн эрдм  
эргн тогтдж бәәтхә,  
Эн хамг цугтан  
седклинь оньдин эзлткә...  
Геедрсн ўрән олсн  
экин зўркнь амрв,  
Герлтсн республикән авсн  
хальмгм делгү байрлв.

ИНДЖИН Лидж.